

## Morning Dogri (NSD) National News Bulletin 31-08-2024

- प्रधानमंत्री नरेन्द्र मोदी होर अज्ज 3 वंदे भारत रेलगडिडएं गी झंडी दस्सियै रवाना करगंन।
- प्रधानमंत्री नरेन्द्र मोदी होर अज्ज नमीं दिल्ली भारत मंडपम च जिला न्यायपालिका बारे दो रोजा सम्मेलन दा उद्घाटन करगंन।
- झारखंड दे साबका मुख्यमंत्री चम्पई सोरेन ते उंदे पुत्तर कल रांची च बीजेपी च शामिल होईं गे।
- भारत, मालदीव, मॉरीशस ते श्रीलंका हिंद महासागर च सुरक्षा चुनौतिएं कन्नै निबड़ने लेई कोलंबो सुरक्षा कंकलेव स्थापत कीता।
- मौसम सरबन्धी मैहकमा नै अरब सागर उपपर डूहगा दबाह बनने पर समुंद्री तूफान आसना दी चेतावनी दिक्ती ऐ।
- विश्व अंडर-20 एथलेटिक्स प्रतियोगिता च भारत दी आरती नै 10 जहार मीटर तेज चलने आली रेस च कैह दा तगमा जित्तेआ ऐ।

<><><><><><>

### Vande Bharat Train

प्रधानमंत्री नरेन्द्र मोदी होर अज्ज दपैहरी त्रै वंदे भारत रेलगडिडएं गी वीडियो कांफ्रेंसिंग राएं झंडी दस्सगंन। मेक इन इंडिया ते आत्मनिर्भर भारत सोच बक्खी बधदे होई अज्ज कल दी नमीं तकनीक कन्नै तैआर वंदे भारत एक्सप्रेस मेरठ-लखनऊ, मदुरई-बैंगलुरु ते चेन्नई-नागर कोईल रूटें पर संपर्क गी होर बेहतर बनाग। एह त्रै रेलगडिडयां लोकें गी वैश्विक स्तर दे सफर, अराम ते खाने दी सुविधा मुहैया करोआग। रोज रेलगडिडएं च सफर करने आले नौकरी पेशे आले लोक, विद्यार्थीएं गी एहदे कन्नै लाह पुज्जग। एह रेलगडिडएं कन्नै त्रै राज्यें उत्तर प्रदेश, तमिलनाडू ते कर्नाटक दे लोकें दी रेलयात्रा केई गुणा बेहतर होग। साढ़े संवाददाता नै दस्सेआ जे मेरठ-लखनऊ बश्कार चलने आली वंदे भारत एक्सप्रेस च 8 डब्बे होंगन ते एह रेलगडिड अपना फासला तकरीबन 7एं घैंटे 15 मिंटें च पूरा करोग। मेरठ-लखनऊ वंदे भारत एक्सप्रेस अपनी नियमित सेवा लखनऊ थमां ऐतवारें शुरू करा'रदी ऐ जदके मीरट सिटी जंक्शन थमां एह सेवा सोमवारे शुरू होग। मंगलवार दे अलावा एह

रेलगड्डी 6 दिन चुनोग। मेरठ शैहर थमां बडलै 6 बज्जियै 35 मिंटे पर निकलोग ते लखनऊ थमां दपैहरी 2 बज्जियै 45 मिंटे पर रवाना होग। इस रेलगड्डी कन्नै सफर आसान होने कन्नै समे दी बचत बी होग। आकाशवाणी संवाददाता नै दस्सेआ जे चेन्नई एगमोर ते नागरकोईल बश्कार चलने आले वंदे भारत एक्सप्रेस उद्योग, बपार ते पर्यटक स्थलें जियां त्रिची, मदुरई, दिंगीगुल ते तिरुनेलवेली तोड़ी संपर्क गी बेहतर बनाग।

<><><><><><><>

PM

प्रधानमंत्री नरेन्द्र मोदी होर अज्ज नमीं दिल्ली भारत मंडपम च दो रोजा राश्ट्री जिला न्यायपालिका सम्मेलन दा उद्घाटन करगन। इस मौके पर प्रधानमंत्री होर सुप्रीम कोर्ट दे 75 ब'रे सपूरे होने पर इक स्टैंप ते इक सिक्का बी जारी करगन। सुप्रीम कोर्ट आस्सेआ आयोजित दो रोजा सम्मेलन च जिला न्यायपालिका सरबन्धी मसलें, मूल ढांचा समावेशी अदालतां, न्यायपालिका दी सुरक्षा, केस प्रबंधन ते सिखलाई बारे 5 इजलास होंगन। उद्घाटनी समारोह च मुख् न्यायधीश, केन्द्री न्याह् मंत्री ते एटार्नी जनरल होर बी मजूद रौंहगन।

<><><><><><><>

PM-Brunei-Singapore

प्रधानमंत्री नरेन्द्र मोदी होर मंगलवार गी ब्रुनेई ते सिंगापुर दे त्रै दिनें दे दौरे पर जांगन। नमीं दिलली च मीडिया गी कल संबोधत करदे होई विदेश मामले मंत्रालय दे प्रवक्ता रंधीर जयसवाल होरें आखेआ जे प्रधानमंत्री होर अगले म्हीने दी 3 तरीक गी ब्रुनेई दारुसलाम जांगन जेहदा साददा ब्रुनेई हॉजी हस्सानल बोलकियाह सुल्तान होरें दित्ता हा। जयसवाल होरें आखेआ ऐ जे एह भारत दे कुसा बी प्रधानमंत्री हुंदा इस देश च पैहला दौरा ऐ। उनें आखेआ जे इत्तेफाक कन्नै एह दौरा भारत ब्रुनेई बश्कार कुटनीतिक गठजोडघ दी स्थापना दे 40 ब'रे पूरा होने पर लाया जा'रदा ऐ।

<><><><><><><>

Champai Soren BJP

झारखंड दे साबका मुख्यमंत्री चम्पई सोरेन होर कल रांची च इक समारोह दरान बरजेपी च शामिल होई गे। उंदे कन्नै गै उंदे पुत्तर बाबूलाल सोरेन बी बीजेपी च शामिल होई गे। इस मौके पर बीजेपी दे वरिष्ठ लीडर बाबूलाल मरांडी, शिवराज सिंह चौहान ते हिमंता बिसवा शर्मा होर बी मजूद हे। इस मौके पर बोलदे होई श्री सोरेन होरें आखेआ जे ओह आदिवासिण दी पंछान ते अस्तित्व गी बचाने लेई बीजेपी च शामिल होए न जेहड़ी बंगलादेश थमां बड़ी मती घुसपैठ कारण राज्य दे संथल परगना इलाके च दांव उप्पर लग्गी दी ऐ। श्री सोरेन होरें आखेआ जे बड़डे पैमाने उप्पर बंगलादेश थमां घुसपैठ कारण राज्य दी आबादी दा संतुलन बिगड़ी गेआ ऐ।

<><><><><><><>

## Colombo Security Conclave

भारत, मालदीव, मॉरीशस ते श्रीलंका नै हिंद महासागर च सुरक्षा सरबन्धी चुनौतिण कन्नै निबड़ने लेई कोलंबो सुरक्षा कंकलेव स्थापत करने लेई इक सैहमति पत्र पर दस्तखत कीते न। दस्तखत करने आला समारोह श्रीलंका दी सरकार नै कोलंबो च आयोजित कीता हा। भारत दी तरफा राश्ट्री सुरक्षा सलाहकार अजीत डोभाल होरें सैहमति पत्र पर दस्तखत कीते। इस मौके पर बोलदे होई श्री डोभाल होरें आखेआ जे समुंद्रै च पारम्पारिक, गैर पारम्पारिक ते होरने नमीं चुनौतिण कन्नै निबड़ने लेई बड़ा सीएससी मता महत्वपूर्ण ऐ। एहदा मकसद मिंबर मुखे सामने पेश आवा'रदी चुनौतिण कन्नै निबड़ना ऐ। एहदे इलावा एह कंकलेव समुंद्री सुरक्षा, आतंकवाद ते अतृप्तवाद, तस्करी संगठित अपराध ते आपदा प्रबंधन च बी मिंबर मुख्य आपस च साथ सैहयोग करगन। इस दौरे दरान डोभाल होरें श्रीलंका ते राश्ट्रपति रानिल विक्रमसिंघे ते प्रधानमंत्री दिनेश गुणावरधने हुंदे कन्नै बी मलाटी कीती।

<><><><><><><>

## IMD

भारत मौसम विभाग नै अरब सागर पर गैहरा दबाह गी दिक्खदे होई चक्रवाती तूफान आसना दी चेतावनी जारी कीती ऐ जेहदे कन्नै गुजरात च खरी मती बरखा पौने दे आसार न। इस तूफान दे उत्तर-पूर्वी अरब सागर दे उप्पर पच्छिम-उत्तर पच्छिम दिशा च बधने दी मेद ऐ ते अगले 24एं घैंटे च भारती समुंद्री कंडे थमां हटने दी पेशगोई कीती गई ऐ। अपने 24एं घैंटे च गुजरात दे कच्छ इलाके च खरी मती बरखा पेई सकदी ऐ। तोआई मौसम विभाग नै

ओडिशा, छत्तीसगढ़, तटीय आंध्रप्रदेश, यनम ते तटीय कर्नाटक दे किश थाहरें भारी बरखा पौने दी मेद जताई ऐ। मध्य भारत, केरल, पुडुच्चेरी दे माही जिले, तटीय कर्नाटक ते मध्य महाराष्ट्र च अगले 7एं दिनें तोड़ी मती बरखा पेई सकदी ऐ। मौसम विभाग ने नागालैंड, मणिपुर, मिजोरम, त्रिपुरा, अंडमान निकोबार टापू, ओडिशा, जम्मू कश्मीर, लद्दाख, गिलगित बल्तिस्तान, मुज्जफराबाद, हिमाचल प्रदेश, उत्तराखंड ते पूर्वी राजस्थान च अगले 7एं दिनें दरान हल्की थमां दरमेयानी दर्जे दी बरखा बरने दी पेशगोई कीती ऐ।

<><><><><><>

NIA

राष्ट्रीय जांच अजेंसी एनआईए नै दिल्ली, हरियाणा, पंजाब ते उत्तर प्रदेश च केईं थाहरें पर छापेमारी कीती। प्रतिबंधत सीपीआई माओवादी संगठन गी दोबारा उत्तर क्षेत्र च अपने सिर नेई चुकने देने दे मकसद कन्नै एह गैह पुट्टी गई। शक्क दे दायरे च किश लोकें थमां लैपटॉप, मोबाइल फोन ते निक्की डेयरियां बरामद कीतियां गेइयां। दूई बक्खी एनआईए नै विश्व हिंदू परिषद दे नेता विकास बब्बर दी तालमी बिनाह पर कीती गई हत्या दे सरबंधा च पंजाब च बी तपाशी कम्म चलाया। हत्या च कथित तौर पर शामिल लोकें दी संबंधत थाहरें पर तलाशी लैती गई। अजेंसी नै डिजीटल समेयान ते दूई एतराज जनक चीजां कब्जे च लैतियां न। एनआईए दी अजें तोड़ी दी जांच च सामने आया ऐ जे वीएचपी नेता दी हत्या दी योजना बब्बर खालसा अंतर्राष्ट्रीय दे विदेशी संचालरें तरफा बनाई गई ही।

<><><><><><>

World U-20 Athletics

विश्व अंडर-20 एथलैटिक्स प्रतियोगिता च आरती होरें महिलाएं दी 10 ज्हार मीटर तेज चलने आली प्रतियोगिता च कैह दा तगमा जित्ती लैता ऐ जेहदे कन्नै पेरु दे लीमा च भारत दा खाता खुल्ली गेआ ऐ। प्रतियोगिता ते खीरी दिन दे पैहले आरती होरें 44 मिनट 39.39 सैकेंड च त्रिया गेड़ पूरा कीता। 17 बरें दी आरती होरें इस बरे मार्च च बनाए गेदे अपने गै रिकार्ड 47 मिनट, 21.04 सैकेंड गी त्रोड़ेआ। तेज चालक आले चीनी बाइमा होरें सुन्ने दा ते मीलिंग ची होरें चांदी दा तगमा जित्तेआ।

<><><><><><>

## Prez-Paralympics

राष्ट्रपति द्रौपदी मुर्मू होरें पैरिस पैरालंपिक 2024 च महिला 10 मीटर एयर राइफल वर्ग च सुन्ने दा तगमा जित्तने आली अवानी लाखरा गी मुबारकबाद दित्ती ऐं इक सोशल मीडिया पोस्ट च सुश्री मुर्मू होरें आखेआ जे लाखरा हुंदा एह कुल त्रिया ते सुन्ने दा दूआ तगमा ऐ। राष्ट्रपति होरें आखेआ जे मुल्खै गी अवानी दी इस उपलब्धि उप्पर गर्व ऐ। प्रधानमंत्री नरेन्द्र मोदी होरें बी अवानी लाखरा गी पैरिस पैरालंपिक च सुन्ने दा तगमा जित्तने पर मुबारकबाद दित्ती।

<><><><><><>